

## Les 6 - Openbaring 6

### Eerste ses seëls

**6**<sup>1</sup> Ek het gesien toe die Lam een van die sewe seëls oopbreek. En ek het een van die vier lewende wesens soos die geluid van 'n donderslag hoor sê: “Kom!”<sup>2</sup> Ek het gesien, en kyk, daar was 'n wit perd. Sy ruiter hou 'n boog vas, en 'n oorwinnaarskroon is aan hom gegee. Hy het opgetrek as oorwinnaar, en om te oorwin.<sup>3</sup> Toe Hy die tweede seël oopbreek, het ek die tweede lewende wese hoor sê: “Kom!”<sup>4</sup> 'n Ander perd, 'n vuurrooie, het toe uitgegaan. Aan sy ruiter is vergun om die vrede van die aarde weg te neem, sodat mense mekaar kon doodmaak. Aan hom is ook 'n groot swaard gegee.<sup>5</sup> Toe Hy die derde seël oopbreek, het ek die derde lewende wese hoor sê: “Kom!” Ek het gesien, en kyk, daar was 'n swart perd. Sy ruiter hou 'n weegskaal in sy hand.<sup>6</sup> Ek het toe iets soos 'n stem tussen die vier lewende wesens hoor sê: “'n Rantsoena koring kos 'n denarius, en drie rantsoene gars kos 'n denarius, en moenie dat daar skade kom met die olyfolie en die wyn nie.”<sup>7</sup> Toe Hy die vierde seël oopbreek, het ek die vierde lewende wese hoor sê: “Kom!”<sup>8</sup> Ek het gesien, en kyk, daar was 'n vaal perd. Sy ruiter se naam is Dood, en die Hades volg hom. Aan hulle is volmag gegee om 'n kwart van die aarde dood te maak deur die swaard, hongersnood, 'n dodelike siekte, en die wilde diere van die aarde.<sup>9</sup> Toe Hy die vyfde seël oopbreek, het ek aan die voet van die

altaar die siele gesien van dié wat doodgemaak is vanweë die woord van God en die getuienis wat hulle gelewer het.<sup>10</sup> Hulle het met 'n harde stem geroep: “Tot wanneer, heilige en ware Here, gaan U uitstel om u oordeel te voltrek, en ons bloed op die aardebewoners te wreek?”<sup>11</sup> Daarop is aan elkeen van hulle 'n lang wit stola gegee, en hulle is aangesê om nog 'n kort rukkie te rus, totdat hulle medediensknegte en broers, wat ook soos hulle doodgemaak gaan word, voltallig sou wees.<sup>12</sup> Ek het gesien toe Hy die sesde seël oopbreek. En daar het 'n groot aardbewing plaasgevind. Die son het swart geword soos 'n harige sak, en die maan het geheel en al soos bloed geword.<sup>13</sup> Ook die sterre het uit die hemelruim op die aarde geval, soos wanneer 'n vyeboom sy groen navye afgooi as dit deur 'n stormwind geruk word.<sup>14</sup> Die hemel het verdwyn, soos 'n boekrol wat opgerol word, en elke berg en eiland is uit sy staanplek verskuif.<sup>15</sup> Die konings van die aarde en die hoofamptenare, die chiliarge die rykes en die invloedrykes, elke slaaf en elke vry mens het in die grotte en onder die kranse in die berge weggekruip.<sup>16</sup> Hulle het na die berge en kranse geroep: “Val op ons, en verberg ons van die aangesig van Hom wat op die troon sit, en van die toorn van die Lam;<sup>17</sup> want die groot dag van hulle toorn het aangebreek, en wie kan staande bly?”

## 1. Inleiding

Die boekrol in God se regterhand, wat die toekomsgeiedenis bevat, kan eers volledig ontou wanneer al sewe die seëls gebreek is. Die reeks seëls is daarom 'n voorlopige oordeelsvoltrekking as voorspel tot die trompette en bakke wat volg. Die eerste vier seëls, die vier perderuiters, volg deur die Lam se toedoen. Die Lam inisieer hierdie gebeure deur die seëls een vir een oop te maak, terwyl God dit telkens goedkeur (vgl die uitdrukking is gegee in 6:2, 4 en 8).

Die eerste vier seëls fokus op die ontaarding van die mensheid deur propaganda, oorlog, hongersnood en die dood. Dit vorm 'n logiese gang van menslike selfvernietiging wat God toelaat. Die vier perderuiters in 6:1-8 verwys gedeeltelik na Sagaria 1:7-11 en 6:1-8. Die vier stryd-waens in Sagaria 6:1-8 word geïnterpreteer as die vier winde. En die vier perderuiters van Sagaria 1:8 ry op bruin, vos en wit perde.

Sommige verklaarders stel 'n vreemde agtergrond vir hierdie vier perderuiters van Openbaring voor, naamlik 'n astrologiese verklaringsring. Die perde is hiervolgens komete, en die ruiters sekere konstellasies van sterre: Leo, Virgo, Libra en Scorpio. Die kleure van die perde verwys hiervolgens na planete en die rigtings: wit (Jupiter, oos), rooi (Mars, suid), bleek of vaal (Venus, wes) en swart (Mercurius, noord). Dié interpretasie is egter te vergesog om aanvaar te word.

## 2. Indeling

- Die eerste seël: wit perd - vals propaganda (6:1-2)
- Die tweede seël: rooi perd - oorlog (6:3-4)
- Die derde seël: swart perd - hongersnood en inflasie (6:5-6)
- Die vierde seël: grys/ vaalgroen perd - dood (6:7-8)
- Die vyfde seël: die martelare se noodkreet aan die voet van die altaar (6:9-11)
- Die sesde seël: deur natuurrampe geteister (6:12-17)
- Die sewende seël: 'n halfuur stilte in die hemel (8:1)

## Perde in die Bybel

Volgens Bybelse gegewens is perde nie vir vervoerdoeleindes gebruik nie, maar veral in oorloë. Donkies en kamele is vir alledaagse vervoer gebruik. Perde is voor strydwaens ingespan en vir ruitery-afdelings gebruik. Die perd het dus 'n simbool van militêre mag geword (Ps 20:8; Jes 30:16).

*1. Jan du Rand, Die A-Z van Openbaring: 'n Allesomvattende perspektief op die boek Openbaring, Christelike Uitgewersmpy, 2007*